

TUG DLEJ NTAWM KEV TUAG.

Ntawm nuav kuv muab ntu kws Yauhaas Npaayaag sau txug ob tug ntseeg “Hlaa tug dlej ntawm txujkev tuag” txhais rua peb suavdlawg tau nyeem kuas paub has tas, thaus peb yuav tuag losis ncaim lub nplajteb nuav moog lawm zoo lecaag. Peb nyeem kuas peb muaj kev ruaj sab rua peb lub neej thaus peb yuav ncaim lub nplajteb nuav moog. Ua tuab zoo nyeem kuas totaub txug zaaj nuav paab koj txujkev ntseeg.

Tug Ntseeg hab Casab ob tug lug txug ntawm lub chaw kws saib ntsoov rua tim lub nroog kws zoo kawgnkaus yaam tsi muaj dlaabtsi nyuaj rua ob tug. Qhov ntawd muaj ib tug dlej taav ob tug kev, tug dlej ntawd tub heev, ob tug poob sab hab ntshai kawg, xaav has tas, yuav ua lecaag txhaj hlaa tau tug dlej nuav moog rua saab tid u. Muaj ob tug timtswv lug has rua ob tug has tas, “Meb yuavtsum hlaa kuas tau tug dlej nuav moog rua saab tid u”.

Tug Ntseeg nug has tas, “Puas muaj dlua lwm txujkev hlaa moog rua saab tim u?” Ob tug timtswv teb has tas, “Muaj, thaus Vaajtsv tsim nplajteb lug muaj Enauj hab Eliyas ob tug ob leeg xwb, dlhau ob tug lawm tsi pub leejtwg moog txujkev ntawd le lawm moog txug nub kws nov lub suab raaj suab xyu nrov zag kawg.” Tug Ntseeg hab Casab saib nraag saib peg tsi pum muaj kev hlaa moog rua saab ntug dlej tim u le, ob tug txhaj nug ob tug timtswv has tas, “Tug dlej nuav tub ib yaam nkaus lov?” Timtswv teb has, “Tsi tub ib yaam tabsis ib paab tsi tau meb, meb yuav moog tau tej qhov ndlav tej qhov tub, nyob ntawm meb txujkev ntseeg rua tug Tswv kws nyob sau lub nroog kws zoo kawgnkaus xwb.”

Tug Ntseeg hab Casab ob tug txawm ua ib sab nqeg moog rua huv tug dlej, tug Ntseeg tog pluj rua huv dlej, nwg qw rua Casab tas, “Kuv tog pluj rua huv dlej lawm, nplaim dlej tub nyaab kuv lub taubhau lawm, kuv nyob huv qaab nplaim dlej”. Casab teb has tas, “Tijlaug es, tsi ua lecaag, cale zoo sab xwb, kuv tub hlaa dlej txug ntawm aav lawm.” Tug Ntseeg has tas, “Phoojywg es, txujkev tuag nyob puag ncig kuv, kuv tsi pum lub nroog kws muaj kua mig hab zib ntaab le lauj.” Lub sijhawm ntawd tug Ntseeg lub ntsejmuag tsaus nti saib tsi pum dlaabtsi ces nwg cale nov qaab ncu tsi tau tej yaav taag lug, nwg nyuaj sab ntshai tsaam ces nwg tuag rua huv dlej es yuav moog tsi txug tim lub nroog kws dlawbhuv. Cov tuabneeg kws nyob tim ntug dlej pum has tas nwg muaj kev ntxhuv sab txug nwg tej kev txhum kws nwg tau ua yaav taag lug thaus nwg tsi tau pib taug kev lug, nwg pum dlaab lug loojkoov dlaag ntxag nwg ruaqhov nwg pheed has le ntawd.

Casab ntsab nkaus tug Ntseeg lub taubhau nqug rua sau nplaim dlej, qho zag nwg tog rov qaab rua huv dlej ib plag tawm rov lug rua sau nplaim dlej txujsa yuav laug tu, Casab ua tag nplig nwg sab has tas, “Tijlaug, kuv pum muaj tuabneeg tuaj tog ib tim lub qhovrooj nroog.” Tug Ntseeg teb has tas, “Puab tuaj tog koj xwb tsi yog kuv, txij thaus kuv paub koj lug, kuv pum tas, koj muaj kev casab heev.” Casab has tas, “Puab tuaj tog koj hab.” Tug Ntseeg has tas, “Yog kuv tub coj tau lub neej zoo lawm, ua caag puab tsi tuaj paab cawm kuv, losis vim kuv tau ua kev txaug kev txhum yaav taag lug lawm, kev puamtsuaj txhaj lug txug kuv nub nua, puab txhaj muab kuv tso tseg puab txhaj tsi tuaj paab kuv.” Casab has tas, “Tijlaug, koj nov qaab zaaj kws has txug tug tuabneeg ua phem, thaus nwg tuag nwg has tas, nwg tsi nyuaj sab dlaabtsi le.” Vaajtsv yeej tsi tso koj tseg, tabsis nwg tsuas xaav sim koj saib koj puas tseem ncu txug nwg txujkev hlub koj kws nwg tub tau pub yaam kws zoo kawgnkaus rua koj lawm, hab thaus kws koj raug kev txomnyem los koj puas tseem ntseeg nwg.” Thaus Casab ntuag nwg le nuav taag ces Tug Ntseeg txawm ntsag tu tsi has lug lawm, Casab ntuag nwg ntxiv has tas, “Tijlaug, koj cale zoo sab, Tswv Yexus tub zaam koj tej kev txhum taag lawm.” Taamsim ntawd, tug Ntseeg has nrov nrov has tas, “Kuv rov qaab pum tug Tswv lawm, nwg has rua kuv has tas, “Thaus koj hlaa dlej kuv yuav nrug nraim koj, hab dlej yuav tsi nyaab koj.”

Tug ntseeg hab Casab muaj lub sab tawv hlaa tug dlej ntawm txujkev tuag moog, dlaab tsi lug dlaag ntxag ob tug lawm, tuab plag ntawd xwb ob tug tub txug tim ntug dlej qhov chaw ndlav ndlav

lawm. Ob tug timtswv nqeg moog tog txais ob tug, thaus ob tug txug tim ntug dlej lawm, muaj cov timtswv tuaj tog txais ob tug hab has tas, “Tug Tswv khaiv peb tuaj tog cov tuabneeg kws yuav nkaag moog huv tug Tswv lub ntuj Ceebtsheej.” Timtswv coj Tug Ntseeg hab Casab ob tug ncaaj nraim moog rua tim lub qhovrooj kws yuav nkaag moog rua huv lub nroog kws dlawbhuv nyob sau tauv fuab, sau lub roob luj luj sab sab. Ob tug txivneej nuav muab ob tug cev rig tsho (lub cev nqaj dlaim tawv) hle pov rua huv tug dlej ntawm txujkev tuag, ob tug timtswv coj ob tug yaa moog rua sau ntsuab ntug hab nruag ob tug thaam txug lub nroog kws zoo kawgnkaus, lub nroog ntawd zoo nkauj hab ci ntsaag ab yaam tsi paub pav le.

Timtswv taw teg rua tim lub nroog hab qha has tas, “Ntawd yog lub Roob Xi-oos kws yog lub Nroog Yeluxalees nyob sau ntuj Ceebtsheej. Muaj cov timtswv hab cov tuabneeg ncaaj nceeg suav tsi txheeb nyob tid, nwg nuav meb yuav tau moog txug ntawm Vaajtswv lub vaaj kws muaj txiv maab txiv ntoo kws noj muaj txujsa tsi paub kawg, meb yuav tau noj tsov txiv ntoo kws muaj txujsa ntev dlhawv moog ibtxhis. Thaus meb moog txug tid lawm, meb yuav tau naav cev rig tsho dlawb, meb yuav nruag Vaajntxwv taug kev thaam pem ua ke moog le. Yuav tsi muaj kev txomnyem, kev tusab, kev mob hab kev tuag lawm, ruaqhov lub neej qub tub dlua moog tsi muaj ntxiv le lawm, nwg nuav meb yuav moog txug Anplahaam, Ixaj, hab Yakhaus hab moog txug cov xwbfwb cev Vaajtswv lug kws Vaajtswv tub cawm puab dlim lawm txhua tug. Nwg nuav cov tuabneeg ntawd puab txhua tug nyob rua huv puab txujkev ncaajnceeg.

Tug Ntseeg hab Casab nug timtswv has tas, “Thaus moog txug tid lawm puas muaj dlaabtsi ua?” Timtswv has tas, “Meb yuav tau su lug sav hab dlim ntawm kev txomnyem txhua yaam, meb yuav tau zoo nyob kaaj sab lug ruaqhov meb yuav tau nqe zug rua tej num kws meb tau ua lug lawm; meb yuav tau nqe zug lug ntawm txujkev thov Vaajtswv nruag kev quaj ntsuag rua tej dlejnum zoo hab kev tiv kev txomnyem huv nplajteb.” Thaus meb moog txug tid meb yuav tau ntoo kaumom kub, meb yuav pum tug Tswv lub ntsejmuag kws ci ntsaag ab, ruaqhov Vaajtswv nyob lecaag hab zoo lecaag meb yuav pum Vaajtswv zoo le ntawd. Thaus meb moog txug tid lawm, meb yuav hu nkauj qhuas Vaajtswv ua Vaajtswv tsaug moog le, meb lub qhov muag yuav pum yaam kws zoo nkauj, meb lub qhov ntsej yuav nov Vaajtswv lub suab has lug kws yog lub suab muas mog lomzem zoo noog kawgnkaus le, meb yuav pum meb cov phoojywg kws tub ua meb ntej lug lawm, hab meb yuav muaj kev zoo sab tog txais cov tuabneeg kws lawv meb qaab lug. Meb yuav tau koobmeej kws ci ntsaag ab nruag tug Tswv Yexus rov qaab lug rua huv nplajteb, nwg yuav muaj Leejtxiv tug tshwjchim ci ntsaag ab hab nwg cov timtswv yuav nruag nwg lug kws muaj lub suab raaj suab xyu nrov. Thaus tug Tswv nyob sau lub rooj txavtxim rua tuabneeg nplajteb meb yuav tau nyob ntawm tug Tswv saab xis, thaus tug Tswv txavtxim rua cov tuabneeg phem, meb yuav muaj lug kom cov tuabneeg phem ntawd hab, vim cov tuabneeg phem yog meb cov yeebncuab. Thaus tug Tswv rov qaab moog meb yuav nruag nwg moog kws muaj suab raaj suab xyu nrov, hab meb yuav nruag tug Tswv nyob huv ntuj Ceebtsheej moog ibtxhab ibtxhis tsi paub kawg. Thov kuas txhua tug kws tau nyeem zaaj lug nuav ua lub neej lawv le nqe Vaajlugkub “*Filipis 1:21 has tas: Thaus kuv tseem ua neej nyob nuav kuv nruag Yexus Kheto koom ib txujsa, thaus kuv tuag los kuv yeej yuav moog nruag Yexus Kheto nyob.*”



Tug txhais yog: Kx. Ntxhipov Vaaj